

**Uunga siunnersuut: Sullivinni avatangiisinut suliassaqarfiup ilaata, nunami sullivinni avatangiisinut tunngasup, Namminersorlutik Oqartussanit tiguneqarnissaanik Inatsisartut aalajangiiffigisassaattut siunnersuut**

(Inuussutissarsiornermut, Suliffeqarnermut, Niuernermut, Nukissiuuteqarnermut Nunanullu allanut Naalakkersuisoq)

**Saqqummiussissut**

(Inuussutissarsiornermut, Suliffeqarnermut, Niuernermut, Nukissiuuteqarnermut, Nunanullu allanut Naalakkersuisoq)

**Siullermeernera**

Sullivinni avatangiisinik suliassaqarfiup ilaa, nunami sullivinni avatangiisinut tunngasortaata akisussaaffigilerlugu tiguneqarnissaanik Namminersorlutik Oqartussat aalajangernissaat pillugu siunnersuutikkut matumuuna siunnersuutigineqarpoq.

Suliaqarfimmi sullivinnik avatangiisini isumannaatsumik peqqissumillu, inuiaqatigiinni teknikkikkut inooqatigiinnikkullu ineriartornernermut qaqugukkulluunniit naapertuuttumik sullivinnik avatangiiseqarnissaq qitiutinneqarpoq. Aammattaaq suliffeqarfiit suliffeqarnermi kattuffinnit siunnersorneqarlutik, kiisalu Sullivinnik Nakkutilliisoqarfimmit siunnersorneqarlutik nakkutigineqarlutillu namminneerlutik apeqqutinik isumannaallisaanermut peqqissutsimullu attuumassuteqartunik aaqqiisinaanissaannut tunngavissiiinissaq suliaqarfimmut ilaavoq.

Suliassaqarfiup akisussaaffigilerlugu tiguernerat atatillugu sullivinnit avatangiisit pillugit Inatsisartut inatsisaanik maleruagassaqartinneqassasoq siunnersuutigineqarpoq.

Sullivinni avatangiisit pillugit Inatsisartut inatsisissaattut siunnersuut sinaakkusiussatut aamma piginnaatitsissutitut inatsisaavoq, assersuutigalugu isumannaallisaanermut peqqissutsimullu atortunut piumasaqaatit eqqarsaatigalugit, pilersuisut, sanaartortitsisut, suliassanik suliarinnittut, suliffigisap aaqqissugaanera, teknikkikkut ikiorsiissutit, akuutissat atortussallu, kiisalu ulorianartunik suliaqarnermi ukiukinnerpaaffissaq pillugit illersorsinnaassutsimut aalajangersagaapput, nalinginnaasumik oqaasertalersugaallutik.

Isumannaallisaanermut suleqatigiiffiup piumasaqaataaneranut, sullivinni avatangiisit pillugit ilinniartitaanermut, sullivinnik naliliineranut, sulisitsisup pisussaaffiitut, inuusuttut sulinerannut, ullormut aamma sapaatip akunneranut qasuersaarfissanut minnerpaatut piumasaqaatinik, kiisalu

nakorsamit misissorneqarnernut sinaakkusiussatut aalajangersakkanik siunnersuut ilaatigut imaqarpoq.

Sullivinnik avatangiisinik suliassaqarfimmi suleriaatsit maannamut atuuttut ingerlaqqinnissaat sullivinni avatangiisit pillugit Inatsisartut inatsisissaattut siunnersuutikkut naatsorsuutigineqarpoq.

Maannamut suleriaatsit ingerlateqqinnissaannut periarfissaqarpoq, sullivinni avatangiisit pillugit Inatsisartut inatsisissaattut siunnersuut sullivinni avatangiisit pillugit Kalaallit Nunaannut inatsimmut maannamut atuuttumut assingummat.

Suliassaqarfiup akisussaaffigilerlugu tiguneratigut najukkami tunngaveqarnerup ingerlatsinerullu inuiaqatigiinnut eqqaminiittunut qanimut attaveqarnerup Kalaallit Nunaanni sullivinni avatangiisinut tunngasut eqqumaffigineqarnerulernerannik kinguneqarsinnaanera iluanaarutit allat ilagivaat. Tamanna suliat qanitat nammineq suliarineqartarnerinik taaneqartarpoq. Taamaasilluni suliassaqarfiup nunatsinni ingerlanneqarnera tigusinikkut maluginiarneqarnerulersinnaavoq.

Suliassaqarfiit akisussaaffigilerlugit tiguneqaraangata, suliat qanitat nammineq suliarineqartarnerinik tunngaveqarnerup sunniuteqartarnera siusinnerusukkut takoreerparput, assersuutigalugu aatsitassanik ikummatissanillu suliassaqarfik tiguneqarmat. Taamaasilluni aatsitassanik ikummatissanillu suliassaqarfik tiguneqarmat, aatsitassanik ikummatissanillu ingerlatat tiguneqannginnerannut naleqqiullugu annertuserujussuarput, taamanikkut suliassaqarfik danskit oqartussaasuinit ingerlanneqarallarmat.

Assersuut alla tassaavoq nukissiuutinik suliassaqarfik, Nukissiorfiit nukissamik pilersuinerata ullumikkut 70 %-ii nukissamik ataavartumik tunngaveqarpoq.

Maluginiagaqarnerulernerumut kiisalu suliassaqarfiup tiguneqarnerata kingorna ilisimasat iluatsittumik amerliartortinnerannut Kalaallit Nunaanni Aalisakkanik Misissuisoqarfiup akisussaaffigilerlugu tiguneqarnera assersuutissaavoq alla. Taamaasilluni Pinngortitaleriffik ilisimatusarfiuvoq ingerlalluartoq, nunat tamalaat akornanni pitsaassusiliinerit qaffasinnerpaat malillugit ingerlasoq, aamma Pinngortitaleriffik ilaatigut nunat tamalaat akornanni ilisimatusarnermik ingerlatanut iluatsitsilluarluni peqataasarpoq.

Naalagaaffimmi oqartussat suleqatigalugit piareersaataasumik sulineq tunngavigalugu siunnersuut suliarineqarpoq, soorlu tamanna Namminersorneq pillugu Inatsimmi piumasaqaataasoq.

Taamatut oqaaseqarlunga siunnersuut Inatsisartunut suliassanngortippara.